

Lai dèm'nâle

Nôs ains vu dains ènne âtre hichtoire, c'ment qu' ci Djeain était dev'ni r'môlou aiprés qu' èl euche inventè lai coérbatte. En l' ècmenç'ment, èl allait d' aivô sai Yâdine pe tot son airtifâye, d' in yûe en in âtre po r'bèyie l' fie. Mains mitnaint qu' èl avait des afaints, sai fanne n' le poéyait pus aidé cheûdre po virie lai coérbatte.

Èl éprouvé d' virie lai coérbatte d'aivô ènne main, pe péssait l' uti ch' lai ribe d' aivô l' âtre main. Mains dînche, è n' fsait ran qu' di traivaiye de poûe. L' uti dainsait ch' lai ribe è drète, è gâtche, è le n' poéyait p' maîtraiyie. Èl avait éprouvé âchi d' virie lai coérbatte d' aivô le dg'nonye obîn d' aivô l' pie, mains c'était encoé pé. Ch' è d'moérait drassie, lai coérbatte l' tchaiyoutait d' ènne sen d' ènne âtre, c'ment in bloûetchie qu' an airait choûelè. En s' sietaint, è s' daivait écabreleutchie qu' èl en predjait son aipiomb. In còp, èl était meinme tchoé aivâ d' sai sèlle, qu' è s' était bîn fait mâ !

L' pus grôs d' ses afaints airait bîn v'lu allaie d' aivô son père po virie lai coérbatte. Mains èl était trop p'tét, è n' avait ran qu' cîntche ans. È srait aivu sôle quasi d'vaint d' aivoi ècmencie l' traivaiye. Pe, c' était daindg'rou. In djoué qu' è s' aimusait d' aivô lai ribe, lai coérbatte y' avait rontu doûes dents.

Le r'môlaidge yi bèyait bîn di traivaiye, les dgens di càre de tiere en aivînt fâte. Paifois son bâ-père l' aiccompaignait po allaie r'môlaie. Ès s' poéyînt tchaindgie l' traivaiye, yun viraint lai coérbatte, l' âtre péssaint l' uti ch' lai ribe.

Mains l' pus s'vent, ç' ât tot d' pai lu qu' è daivait raiffilaie les utis en les riffaint chus ènne piaite piere. C' était bîn pus du qu' d' aivô lai ribe, pe chutôt, l' traivaiye n' était p' che bîn fait, p' èl avait moins d' aivance. N' t' en fais p', qu' yi diait sai Yâdine en l' embraissaint, dains quéques l' annèes, tai p'tête airaingne t' veut poéyait r'cheûdre po virie lai coérbatte !

In bé djoué, è voyé son boûebat, ci Dyène, qu' s' aimusait è s' pendre aiprés lai coérbatte. Lai pâjainne ribe en viraint d' ènne sen tirait l' boûebat vés le hât. Aiprés, tiaind qu' lai ribe virait dains l' âtre sen, l' suchpendu boûebat déchendait. Pe, d' aivô son émeû, lai ribe r' tirait l' afaint vés le hât. Dînche aidon djainqu' lai ribe n' aiveuche pus d' ébrûe !

Piein de s'né, l' Djeain s' dié : i crais bîn qu' i aî trovè c'ment qu'è fât faire po poéyait faire è virie lai coérbatte d' aivô l' pie, pe qu' ses mains feuchînt loques po t'ni l' uti ch' lai ribe. Èl aittaitché yun des bouts d' ènne coûedge â maindge d' lai coérbatte, pe l' âtre âtoué d' son soulafe. C' était dj' in premie l' aitiu. Mains tiaind qu' lai coûedge s' envôjait âtoué di maindge, è daivait tot râtaie po lai r'dévudivie. Sai fanne, lai Yâdine yi dié : en lai piaice d' lai coûedge, è fârait poéyait botaie âtche de du que s' n' envôjeuche pe âtoué di maindge. Ah ! Mai fanne, t' és ènne boinne aivisâle. Chi, è n' fât p' faire c'ment l' airaingne qu' envôje son flè! È poiché in prou grôs p'tchus en yun des bouts d' ènne yichte po l' enf'laie dains l' maindge d' lai coérbatte, pe in p'tét p'tchus en l' âtre échtrémité, laivou qu' è péssé in échpèche d' étrie fait en coûedge. Mitnaint, è poyé r' môlaie tot d' pai lu, sains niun d' âtre po faire è virie lai ribe. È y' avait tot d' meinme encoé âtche qu' n' était p' définmeu. È sôlait brâment è câse d' l' ébaitt'ment d' son pie.

Papa, breûyé l' Dyène, ravoète note tchait qu' voérait aitraippaie in cra dains l' aîbre. Mains tiaind qu' le tchait s' aipprethait di cra, l' oûejé voulait en breûyaint chus ènne âtre braintche. Aigrîmpè, l' noi l' oûejé montait, déchendait, pe r'montait, r'déchendait, ..., in pô c'ment son pie dains l' étrie, mains èl était dyidie poi lai braintche. Voili ç' qu' è m' fât qu' breûyé l' Djeain. Èl aittaitché in lavounat â béche d' lai yichte. È n' avait pus qu' è preussie chus l' lavounat d' aivô son pie qu' dains son émeûsse de vait-è-vînt entrînnait l' virat d' lai ribe.

Note Djeain v'niait d' inventaie l' compyiquè mécânichme : rûe – dèm'nâle –frâte.